

# Meeqqat Ikiortigit: Tasiilami suliniuteqarneq salliutinneqarli

Ineriartorneq mumisinniarlugu Tasiilami suliniuteqarneq salliutinneqartariaqartoq, ikiuiniaqatigiiffik Meeqqat Ikiortigit Kalaallit Nunaat taama isumaqarpoq.



Meeqqat Ikiortigit siulittaasuat, Jonna Ketwa  
Leiff Josefsen

AAQQISSUISOQARFIK | Saturday, 11. May 2019 - 09:18

Piviusulersaarummi aallakaatitassiami ”Byen hvor børn forsvinder”-imi takutinneqartunut, meeqqanut ikiuiniaqatigiiffimmut Meeqqat Ikiortigit assut aalassatsitsipput.

- Inuit arlaqartut Rikketut aammalu Naasunnguutullu sulissuteqartut Kalaallit Nunaanni meeqqat inuusuttullu atugarisaat pitsanngortinniassallugit sulissuteqartut amerlammata. Red Barnet Kalaallit Nunaat qujamasoqaaq inuit sapiissuseqarlutik uummateqarluarlutillu meeqqat inuusuttullu sullittarmatigit. Qujamasuuteqaqaagullu soqutiginnillutik DR maani nunatsinni annertuunik qanoq iliuseqarluta sorsutatsinnut takutitsisimmata, ikiuiniaqatigiiffik tusagassiuutinut nalunaarummi allappoq.

## Ajorluinnartoq

- Nukiit atorqearsinnaasut tamarmik pisariaqartippagut, suliaq annertoq meeqqat inuusuttullu pisinnaatitaaffiisa ingerlatiinnarnissaanut. Pitsanngoriartortoqarpoq, tamanna inuiaqatigiinni misissuinerup 2018-meersup takutippaa, taamaakkaluartoq eqqissilluta pinissatsinnut piffissaanngilaq. Kalaallit Nunaanni meeqqat iluamik toqqissisimanartumillu ineriartornissaat sulissutigalugu sulis sorsuutigisariaqarparput.

Ikiuiniaqatigiiffik isumaqarpoq, inuunermik imaqarluartumik isumalimmillu meeqqanut inuusuttunullu toqqamaviliinissaq suliarujussuusoq annertoq, meeqqat inuusuttullu kinguaassiuutitigut

atornerlugaasimasut, persuttarneqarsimasut, aanngajaarniutininik imigassamillu atuisuusunik eqqugaasimasut aammalu peroriartornerminni arlaatigut innarlerneqarsimasunut:

- Meeraq inuusuttuarluunniit ikiortissarsiornermini ikiortissaqanngikkaangat ajorluinnarpoq. Inunnik isumaginnittoqarfinnut nalunaaruteqartoqarsimatillugu eqqortumik ikiuisoqarsimanngikkaanga aamma ajorluinnarpoq. Tamanna iluarsisariaqarparput – meeraq ikioqquppat ikiuisinnaasariaqarpugut.

### **Tasiilami suliniuteqarnerup salliutinneqarnissaa**

Taamaattumik Meeqqat Ikiortigit kajumissaarivoq, Tasiilami suliniuteqarneq salliutinneqartariaqartoq.

- Maannakkut suliniuteqarnerit pilersinneqarsimasut naammangitsutut ernumanartoqartippagut, tassami sumiginnaagaasimanagerit annertummata. Imminut toquttarnerit amerlaqisut kisitsisaasa takutippaat tamanna, pingaaruteqarporlu tusarnaartoqarnissaa qanorlu iliuseqartoqarnissaalu. Nunarput akissaqanngilaq qanoq iliuseqanngittoornissaminut, meeqqagummi inuusuttagullu siunissaat eqqarsaatigissagaanni. Kanngutsaattuliortartunik arlaatigulluunniit innarliisartunik pilersitsiuarnissamik akissaqanngilagut. Aaliangersimasunik sullissisussanik amigaateqartoqarpat, Meeqqat Ikiortigit taama oqariartuuteqarput.